



SIARAN MEDIA

JABATAN TENAGA ATOM

KEMENTERIAN SAINS, TEKNOLOGI DAN INOVASI

SESI LIBAT URUS AKTA PERLESENAN TENAGA ATOM (PINDAAN) 2025 [AKTA A1779] PERKUKUH KEFAHAMAN PEMEGANG TARUH

BANGI, 11 FEBRUARI 2026 – Akta Tenaga Atom 1984 (Akta 304) melalui Akta Perlesenan Tenaga Atom (Pindaan) 2025 [Akta A1779] telah dikuatkuasakan pada 1 Disember 2025 oleh Jabatan Tenaga Atom (Atom Malaysia), Kementerian Sains, Teknologi dan Inovasi (MOSTI). Pindaan kepada Akta 304 ini bertujuan memperkukuh kerangka perundangan berkaitan kawalan dan kawal seliaan aktiviti tenaga atom meliputi aspek keselamatan (*safety*), sekuriti (*security*) dan kawal guna (*safeguards*) bagi mewujudkan perundangan negara yang komprehensif selaras dengan piawaian dan standard antarabangsa serta amalan terpuji antarabangsa.

Sesi libat urus Akta A1779 akan dijalankan secara meluas sepanjang tahun 2026. Sesi libat urus pertama telah diadakan pada hari ini dan dirasmikan oleh Ketua Pengarah, Atom Malaysia, YBrs. Puan Hajah Noraishah binti Pungut di Bangi Avenue Convention Centre (BACC). Program ini telah dihadiri oleh seramai 705 orang peserta yang terdiri dalam kalangan pemegang taruh di bawah Akta 304.

Sesi libat urus ini merupakan platform komunikasi berkesan antara Atom Malaysia dan pemegang taruh bagi memberi penerangan pindaan Akta A1779 dan mendapatkan maklum balas daripada peserta. Sesi ini memberikan pengetahuan dan kefahaman kepada peserta mengenai pemerkasaan kawalan dan kawal selia aktiviti tenaga atom di bawah Akta A1779 dalam memastikan aspek keselamatan, sekuriti dan kawal guna sentiasa selamat, terjamin dan terkawal demi melindungi rakyat, alam sekitar dan negara.

#TAMAT#

Dikeluarkan oleh:

**UNIT KOMUNIKASI KORPORAT
JABATAN TENAGA ATOM
11 FEBRUARI 2026**



JABATAN TENAGA ATOM (Atom Malaysia)

Pengawalan ke atas penggunaan benda-benda radioaktif telah dijalankan sejak tahun 1968 lagi apabila Parlimen meluluskan Akta Benda-benda Radioaktif 1968. Memandangkan perkembangan aktiviti tenaga atom yang pesat di Malaysia, kawalan yang lebih berkesan diperlukan. Pada April 1984, Parlimen telah meluluskan Akta Perlesenan Tenaga Atom 1984 (Akta 304). Seterusnya Lembaga Perlesenan Tenaga Atom telah ditubuhkan pada 1 Februari 1985 dan diletakkan di bawah Jabatan Perdana Menteri.

Pada 27 Oktober 1990, jabatan ini telah ditempatkan di bawah Kementerian, Sains, Teknologi dan Inovasi (MOSTI). Seterusnya pada 9 Jun 2022, agensi ini telah dinamakan sebagai Jabatan Tenaga Atom (Atom Malaysia).

Atom Malaysia adalah sebuah badan penguatkuasa yang bertanggungjawab bagi mengawal dan mengawalselia Akta Perlesenan Tenaga Atom 1984 (Akta 304) dan perundangan-perundangan subsidiari yang dibuat di bawahnya. Tujuannya adalah bagi memastikan semua aktiviti yang melibatkan penggunaan tenaga atom dikendalikan dengan selamat tanpa membahayakan pekerja, orang awam, harta benda dan alam sekitar.

OBJEKTIF

Untuk memastikan penggunaan tenaga atom adalah selamat, terjamin dan dikawalguna demi melindungi masyarakat, pekerja dan alam sekitar.

FUNGSI

Fungsi-fungsi Atom Malaysia adalah seperti berikut:

1. Mengawal selia serta mengawasi aktiviti penggunaan tenaga atom dan perkara-perkara yang bersampingan dengannya.
2. Menubuhkan, menyenggara dan mengembangkan kerjasama saintifik dengan mana-mana badan, institusi atau organisasi di peringkat kebangsaan dan antarabangsa berhubung dengan perkara-perkara nuklear atau tenaga atom, sebagaimana difikirkan sesuai oleh Ketua Pengarah bagi maksud Akta Perlesenan Tenaga Atom 1984.
3. Melaksanakan atau memperuntukkan bagi pelaksanaan obligasi yang terbit daripada mana-mana perjanjian, konvensyen atau triti antarabangsa berkaitan

perkara-perkara nuklear atau tenaga atom yang mana Malaysia menjadi suatu pihak, sebagaimana diarahkan oleh Kerajaan Malaysia dan selaras dengan maksud Akta Perlesenan Tenaga Atom 1984.